



UPA 2017/79
Nuuk, 20.04.2017
Peter Olsen

Inatsisartut aalajangiiffigisassaattut siunnersuutigineqarpoq, Naalakkersuisut ukioq 2017 naatinagu kaajallaasitamik nutaamik atulersitsissasut pisortat pisiortortarnerat pillugu, tassanilu aamma kiffartuussinerit ilanngullugit naleqqussarneqarnissaa, siunertaralugu neqerooruteqartitsisarnermut inatsisissamut tunngavissiinissaq eqqarsaatigalugu, soorlu tamanna Inatsisartut UPA2015/118-imi akuersaarneqarneratigut pisussanngortinneqartoq.

(Inatsisartunut ilaasortaq Mala Høy Kuko, Atassut)

Inatsisartunut ilaasortap Mala Høy Kuko Inuit Atassummeersup aaliangiiffigisassatut siunnersuu-taanut qulaani pineqartumut qujalluta, matumuuna Inuit Ataqatigiinniit imatut oqaaseqassagut.

Inatsisartunut ilaasortap Mala Høy Kukop taamatut siunnersuuteqarnermini tunngavilersuutiginerar-paa 2015-mi upernaakkut ataatsimiinnitsinni inatsisartunut ilaasortaasimasup Naja H. Nathanielsenip taamani Inuit Ataqatigiinneersup siunnersuutigisimasaa.

Taamaanikkut Naja H. Nathanielsenip Namminersorlutik Oqartussat iluanni pisiortortarnermut neqerooruteqartarnermullu tunngatillugu inatsisitigut, teknikkikkut, niuerpalaarnikkullu Naalakkersuisut sinnaakkusioqquneqarnissaannik inatsisartut aaliangiiffigisassaannik siunnerteqar-poq.

Piffissaq manna iluatsillugu Naja H. Nathanielsenip siunnersuuteqarnermini tunngavilersuutaa tamakkerlugu issuaaviginngikkaluarlugu, ilaannaanilli kittaarlugu issuafigilaarusuppara:

“Kalaallit Nunaanni nioqqutissanik pisiniarneq tamatigut akikinnerpaajusanngilaq. Akikin-nerpaarli tamatigut pitsaanerpaajusanngilaq. Inuiaqatigiitsinnut pingaaruteqarpoq najukkani suliffeqarfeqarnissaa najukkani suliffissaqartitsisunik nunamilu maani atugassarititaasunik ilisimasalinnik.

Novembarimi 2011 Naalackersuisut siuliisa pisiortornermi nalunaarusiaq saqqummiuppaat Tassani ersepoq Namminersorlutik Oqartussat qitiusumik allaffeqarfiat immikkoortullu taassuma ataaniittut ukiumut minnerpaamik 1,5 milliarder kruunit nalinginut pisiortortartut. Taamaalilluni pisortat pisiortornerat najukkani suliffeqarfiit isertitarisartagaannut annertoorujussuarmik tunng-aviliisuvoq.

Pisiortornermi nalunaarusiami pingaartinneqarpoq pisortat pisiortornerminni pisariillisiaa-nikkut ataqatigiissitsinertigullu aningaasanik sipaaruteqarsinnaanissaat. Soorunami pingaaruteqarpoq pisortat inuiaqatigiit aningaasaataat atorlugit pisiniaraangamik akit qanoq innerannik nakkutiginninnissaat.

Taamaattumik isumaqarpunga inuiaqatigiit aningaasaqarnerannik mianerinninneq inatsisissami ilanngunneqartariaqartoq. Soorlu assersuutigalugu neqerooruteqarnermi piumasaqaatinik ajugaanissamut iluaqutaasunik allattuisoqarsinnaavoq, soorlu najukkamiittuunissamut, suliffimmik misiliffiusinnaasunik pilersitsinissamut imaluunniit Kalaallit Nunaanni suliaqarnermik misilittagaqartuunissamut tunngasunik. Aamma eqqarsaatigineqarsinnaavoq najukkani pisiffigisat avataaniit pisiffigisaniit akisunerulaarnissaannut periarfissaqartitsinissaq”

Mala Høy Kukop siunnersuutimini tunngavilersuuteqarnermini ilaatigut eqqaavaa taamanikkut Naaja H. Nathanielsenip siunnersuutaanut Naalackersuisut akissuteqarnerminni pisiortortanermut kaajalla-asitamik saqqummiusseqaarusunnertik Naalackersuisut kissaatigisimagaat.

Tamanna pillugu Mala Høy Kuko kaajallaasitaliaq saqqummiunneqartussaq saqqummereersimaner-soq § 37 aqqutigalugu apeqquteqaateqarsimavoq. Akineqarsimavorlu tamanna suli naammassineqar-simananilu saqqummiunneqarsimangitsoq.

Pisiortortarnermut neqeroortitsisarnermut inatsisiliornissaq sinaakkusiornissarlu inuiaqatigiit aningaasaqarnerannut pingaaruteqarluinnartuummat, kaajallaasitap naammassineqarnissaa saqqummiunneqarnissaalu pingaaruteqarluinnarpoq.

Taamanna pillugu Mala Høy Kukop siunnersuuteqarpoq **Naalackersuisut ukioq 2017 naatinngagu kaajallaasitamik nutaamik atulersitsissasut pisortat pisiortortarnerat pillugu, tassanilu aamma kiffartuussinerit ilanngullugit naleqqussarneqarnissaa siunertaralugu neqerooruteqartitsisarnermut inatsisissamut tunngavissiinissaq**

eqqarsaatigalugu, soorlu tamanna Inatsisartut UPA2015/118-imi akuersaarneqarneratigut pisussanngortinneqartoq.

Taamaattumik Mala Høy Kukop siunnersuutaa inatsisartut 2015-mili akuersissutigerersimasaannut attuumassuteqartuummat, taamatut oqaaseqarluta Mala Høy Kukop siunnersuutaa Inuit Ataqatigiin-nit taperserlugu ataatsimiisitaliamut susassaqtumut ingerlateqqinneqarnissaa akuersissutigaarput.

Qujanaq